

Unnuisarfinnut nunatta avataaneersunut unnuisunut nunatsinni unnuinermut akitsuummik takornariaqarnermut inuussutissarsiornikkut nunatta inuinit tamanut isertitaqaataasussamik siunnerfilimmik Naalakkersuisut UKA2020 misissuinissamik peqquneqarnissaanik inatsisartut aalajangiiffissaatut siunnersuut. Misissoqquneqarluni takornariaqarnermut innarliutaasinnaangitsumik nunat allat ilinniarfigalugit aaqqissuussinissaq

Inatsisartunut ilaasortamit Aqqalu C. Jerimiassen, Atassut, saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Peter Olsen, Inuit Ataqatigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Henrik Fleischer, Siumut
Inatsisartunut ilaasortaq Múte B. Egede, Inuit Ataqatigiit
Inatsisartunut ilaasortaq Jens Napaattoq, Partii Naleraq

UKA 2019-imi ulloq 10. oktober 2019-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Takornarianut unnuinermut akitsuut atuutsinneqalissappat pisortanut, namminersorlutik inuussutissarsiuteqartunut immikkullu takornariaqarnermut inuussutissarsiuteqartunut kiisalu innuttaasunut aningaasaqarnikkut allaffissornikkullu kingunerisassat misissorneqarnissaat siunnersuuteqarnermi kissaatigineqarpoq. Nunat allat taamatut aaqqissuussinermi misilittagaat misissuinermi ilanngunneqarnissaat kissaatigineqarpoq, tassa taakku sanilliuunneqarsinnaappata aammalu takornariaqarnermik inuussutissarsiummut akornutaanngippata.

2. Ataatsimiititaliap siunnersuummik suliarinninera

Siunnersuutip matuma tapersorsorluarneqarnera ataatsimiititaliamit paasineqarpoq aammalu siunnersuut taama iluseqarluni akuerineqassagaluarpat pissutsit arlallit misissuinerimi ilanngunneqarluarsinnaasut erseqqissaatiginissaat ataatsimiititaliap pissutissaqarsoraa.

2.1 Unnuinermut akitsuutip atuuffissaa

Siunnersuutip misissornerani ersarissorinangilaq unnuisarfiit sorliit misissuiffigineqarnissaat pineqarnersoq. Taamaalillunilu unnuinermut akitsuutip atuuffigisinnaasaannut assigiinngitsunut kingunerisassat ilanngullugit siamasissumik isiginiarneqarnissaat ataatsimiititaliamit kaammattuutigineqassaaq – taakkunungalu ilaapput akunnittarfiit, vandrejemit il.il. kiisalu akiliilluni inuinnarni unnuiffiusinnaasut¹.

Unnuinermut akitsuutip takornarianuinnaq sammititap misissuiffigineqarnissaa siunnersuutikkut kissatigineqarpoq. Tamanna tunngavigalugu tikeraartut assersuutigalugu ilisimatusarnermut atatillugu unnuisarfinnik, takornarianit nalinginnaasumik atorneqartartunik, atuigallartut misissuinerimi ilanngunneqannginnissaat ataatsimiititaliamit Naalakkersuisunut kaammattuutigineqarpoq. Tikeraarnerit allat takornariarnermik siunertaqanngitsut ilanngunneqannginnissaat aamma isumaliutigineqarsinnaavoq.

Matumani apeqqut pingaarutilik tassaavoq: *takornariaq kinaava?* Ilaqutaasoq Kalaallit Nunaannut tikeraartoq takornariaava? Illoqarfimmit/Nnnaqarfimmit ilaqtutanut tikeraartoq takornariatut isigineqarsinnaava? “Takornariaq” kinaanersoq misissuinerimi Naalakkersuisunit sukumiisumik isumaliutigineqarlunilu nassuiarneqassasoq ataatsimiititaliamit sakkortuumik kaammattuutigineqassaaq.

Nunani allani assersuunneqarsinnaasuni akitsuummik takornariaqarnermut inuussutissarsiummut akornutaanngitsumik aaqqissuussinernit atuuttunit misilittakkat misissorneqarnissaat siunnersuuteqartumit kissatigineqartoq ataatsimiititaliamit maluginiarneqarpoq. Namminersortut pisortallu arlallit takornariaqarnermik inuussutissarsiummut aningaasaliissuteqarsimanerat tunngavigalugu misissuinerup nunap immikkoortuinut avillugu ingerlanneqarnissaa ataatsimiititaliamit Naalakkersuisunut kaammattuutigineqassaaq, taamaalillunilu nunap immikkoortuinut ullumikkut takornariarfiunerpaasunut kiisalu nunap immikkoortuinut takornariaqarnermik aatsaat aallarnisartunut qajannarnerusunullu kingunerisassat immikkoortillugit nalilerneqassallutik. Tamatumunnga ilaatigut pissutaavoq nunani allani takornariaqarnermut akileraarusersuinerup/unuinermut akitsuusersuinerup aallarniutaannarmik misissuiffigineqarnera, nuna tamaat pinnagu illoqarfinni/nunap immikkoortuini takornariaqarpallaarnera pissutigalugu akileraarutininik/akitsuutinik taamaattunik atuinissamik amerlasuutigut aalajangertoqartarneranik takutitsisorinartoq.

¹ Taamaalillunilu aamma oqaatigineqartariaqarpoq Airbnb-mik atuneq Kalaallit Nunaanni aamma ilaatigut atugaalersimammat.

2.2 Unnuinermut akitsuummik aqutsineq

Taasissutissap oqaasertalersugaanera tunngavigalugu akiliisiteriasissap misissuiffigineqarnissaa pissusissamisoortutut ataatsimiititaliamit isigineqarpoq. Tamatuma saniatigut qanoq akuttussulimmik akiliisoqartassanersoq – ukiumut, piffissat unnuiffiit ataqatigiissillugit imaluunniit qaammatikkaartumik? Tassunga atatillugu akileraarutininik akitsuutinillu ukiumoortumik akileeqquisarnernit atuuttunit assigisaannillu misilittakkat, qaammatit 12-ikkaarlugit akilersuisarnermit akulikinnerusumik akitsuummik oqartussanut akiliuteqartarnissap pitsaanerusinnaanerani takutitsisut tamatumani isiginiarneqartariaqarput. Tassunga atatillugu akitsuummik aqutsinerup kiisalu nunatta karsianut isertitassatut naatsorsuutigineqartut annertussusissaannik Naalackersuisut aamma misissuinissaat ataatsimiititaliamit pingaartinneqarpoq.

3. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq siunnersuutip piviusunnngortinneqarnerani aningaasaqarnikkut allaffissornikkullu kingunerisassat siunnersuutip nassuiaataani allaaserineqassasut.

Tamanna naapertorlugu siunnersuutip piviusunnngortinneqarnerani aningaasatigut kingunerisassat siunnersuummi nalunaarneqarsimasut ataatsimiititaliamit maluginiarneqarpoq, taamaalillunilu misissuinerminni aningaasartuutissat ukiumi ataatsimi sulisorisap, tassalu 500.000 kr.-it naligissagaat naatsorsuutigineqarluni. Allatut naliliinissamut ataatsimiititaliaq tunngavissaqanngilaq.

3. Ataatsimiititaliap inassuteqaatai

Ataatsimiititaliap **isumaqatigiittup** siunnersuutip **akuersissutigineqarnissaa** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




Hermann Berthelsen
Siulittaasoq



Peter Olsen
Siulittaasup tullia




Karl-Kristian Kruse



Malene Vahl Rasmussen



Henrik Fleischer



Måte Bourup Egede



Jens Napaattooq